

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA APERILA 2022

email: sulusamoa@cccs.org.ws-Main Office: Ph. 24414, Ext 30 - website: www.cccs.org.ws

OSIGA FEAGAIGA EFKS FUSI SAFOTULAFAI



*Valaauina Taumua FS, Tonu Mauafu FS, Esera A. Esera FS, Sotiaka Roma FS, **Tagilima Silipa,** Ioane Viliamu Samoa FT, **Silipa Silipa FS (Faifeau Osi Feagaiga),** Siolo Tauati FT*

AUE! UA MALILIU TOA, UA MĀUMAU AIAU'UPEGA O LE TAUA!



Susuga Nukulaelae Iati FS (ua maliu) le Faletua ia Tuasivi ma se tasi o la'ua alo

FAASINO UPU

1. O LE LAUGA	2
2. MAI LE TUSIAU LEOLEO	3
3. OSIGA FEAGAIGA FUSI, F/AGA	5
4. TUSI FAITAU ASO IA APERILA	6
5. O LE PEROFETA MULIMULI	8
6. NA O AFIOGA E TULEI MAI	11
7. OSIGA FEAGAIGA EFKS MANASE	13
8. O E UA FAI I LAGI FOLAUGA	14
9. O LOO PULE LOU TUPU	15
10. ATA O MATAUPU TUSIA	16

O LE LAUGA

TUSI FAITAU - 2 TUPU 6 : 14 – 23

MATUA - 2 TUPU 6 : 17

“¹⁷Ona tatalo ai lea o Elisaia, ua faapea atu, Le Alii e, ia e faapupula i ona mata ina ia na iloa. Ona faapupulaina lea e le Alii o mata o le taule’ale’a, ona iloa ai lea e ia, faauta foi, ua tumu le mauga i solofanua ma kariota afi, ua latou vagavagai ia Elisaia”.

Manatu Autu : E VAAIA E MATA O LE FAATUATUA, VAVEGA ALE ATUA.

E anoanoa’i le tele o tagata tauaso o loo feoa’i ma ola i le lalolagi. E pupula mata a e savali autagotago. O le mafua’aga, e leaga o loo tauaso faaleagaga. O le ala foi lea o lo latou lē iloa ma le lē malamalama i le uiga o mea ua fa’aali mai e le Atua, aemaise o lu’itau ma faafitauli esee e alia’e mai i le olaga. Tele tagata ua leva ona lolotu, leva ona ola a e latou te lē iloa le matagofie o le Atua. Latou te lē iloa le suamalie o le ola mo Keriso. O le mafuaaga foi lea o le ola faa’afa’afa, ma le fetosoa’iina gofie e lea talitonuga ma lea a’oa’oga. Ua peisea’i ai o se ma’a e fetaavalevlea’i. E atuatuvaale ma popole gofie le loto pe a feagai ma faafitauli.

O foliga ma uiga ia o le auauna a Elisaia le tagata o le Atua. Ua vaai atu ma le popole ua tagata loaloa le laufanua, i ‘au a Suria ma a latou solofanua ma kariota, ua si’o ato ai le aai, ona fefe ai lea. Ua

fesili ia Elisaia le perofeta, pe o le a faapefea nei? E leai ma se tagata o iloa atu e le auauna, a e fai mai le faalototele a le perofeta, “*Aua e te fefe, auā e toatele ua ia te i tatou, i ē ua ia te i latou*”. O upu a le tagata o loo iloa atu le mamalu o le Atua, ma Lona aao fai vavega. A e talofa i le auauna, auā e lē tutusa lana vaai ma le vaai a Elisaia. O le ala lea o le tatalo o Elisaia i le Atua se’i faapupula mata o le auauna. Fai mai le mau, ua faapupulaina e le Alii o mata o le taule’ale’a, ua ia iloa atu foi ua matuā tumu le mauga i solofanua ma kariota afi, ua latou vagavagai ia Elisaia.

Toe tatalo Elisaia, faatauaso ‘autau a Suria. Ona tata’i loa lea i Samaria, toe tatalo ai Elisaia ma faapupulaina o latou mata, ma latou iloa mulimuli ane ai, ua ave faatagataotauaina i latou. E le’i fasiotia e Elisaia ma ‘au a Isaraelu, a e fai mai le mau, ua latou fafaga ma faafeinu ia te i latou, e tusa o le faatonuga a le Atua. Ona ō filemu ai lea o ‘au a Suria ma le māasiasi, e lei toe o mai lava.

O le mata’utia lea ma le silisiliese o le Atua, lea ua faavaai i ai le tupu o Isaraelu ma le auauna a le tagata o le Atua. O Lona silisili ese ma Lona mamalu e iloa e mata o le faatuatua. O Lona silisili ese ma Lona mamalu e to’a ai le loto ma uma ai le faavaivai, a e tetemū ai, ma foi ma le māasiasi le fili.

O le faamalosi’au foi lea mo la tatou faiga malaga i lenei vaitau o le tausaga. O le mea moni ua avea le tele o faafitauli ma le lē mautali o le lalolagi i faama’i o pepesi, ma ala ua peisea’i ua vaivai ifo ai ma lo tatou faatuatua. Foliga ua tatou faapūmoo ai ma le alofa lautele o le Atua, ma Lona aao fai vavega e leai se isi malosi e mafai ona ia faafetauia.

‘Aua tatou te vaai pei o le vaai a le auauna a Elisaia. Ua vaai i le toatele o le ‘autau a Suria ma latou kariota ua si’o ai le aai, ona fefe ai lea ma atuatuvaale. O le vaai a Iutaia ma fitafita Roma ia Iesu i luga o le satauro, o se pagota ua leai se faamoemoe. A e fai mai le faaleoga o le vaai a le ta’ita’i o le toaselau, “*O se Alo lava o le Atua lenei tagata*”. Fai mai le faamalosi a Paulo ia Korinito, “*Auā o le faatuatua ua matou savavali ai, a e lē o le tino mai o mea.*” O le tatalo lea ma le faanaunauga i le Atua le Ekalesia e, ia faapupulaina mata o Lana fanau i le lalolagi, ia iloa atu solofanua ma kariota afi ma ‘au o le lagi, e toatele atu nai lo ‘au a le fili. Ia iloa atu e Lana fanau lo latou Atua mata’utia.

O le faamalosi a Paulo i lana tusi ia Roma, “*Afai ua ‘au ma i tatou le Atua, o ai se faasagatau mai ia i tatou?*” E lē mafai e ni puapuagā, e lē mafaia e ni faama’i, e oo lava i le oti, ona toe faoa lo tatou manumalo ua uma ona tapena faafafine toaga e Keriso. O la Iesu lo tatou Alii, “*E maua outou e le puapuaga i le lalolagi, a ia outou loto tetele, ua ou manumalo i le lalolagi*”. Ioa.16:33. Tatou loto tetele ma faatuatua pea a o tatou feagai ma lenei taimi o faama’i ma fa’auau pea la tatou molimau. Aua ne’i faafefeina i tatou e le faama’i poo ni faafitauli, auā e sili atu le mata’utia o le Atua i mea uma. O loo tumau foi le pule aoao a le Atua i mea uma.

Na maliu Keriso ma toetu manumalo, e fai ma faata’imuaga o lo tatou manumalo. Manuia Samoa lau folauga, i toe masina o lenei tausaga.

Ona o Iesu. AMENE.

Saunia: Lafolafo Amituanai Lemoe FS, EFKS Saasaai, Matagaluega FAASALELEAGA.

MAILE TUSIAU LEOLEO

Tusi Faitau - FT: Salamo 23; FF: Filipi 4: 10 - 20
Matua - Filipi 4: 18, “*A ua ia te a’u mea uma, ua tele lava, ua atoa mea ia te a’u, ina ua maua e a’u mai ia Epaferotu o mea uma ia te outou, o mea manogi lelei, o le taulaga e talia ma le mālie i le Atua.*”

Manatu Autu - **LAVA MA TOTOE**

Faatomuaga: O le masani a lo tatou atunuu i tapenaga mo soo se faalavelave - maliu, faaipoipoga, saofa’i ma isi faamoemoega tetele e auai ma fesaga’i ai ma paolo ma tagata ese - e sauniuni lelei tulaga uma ia lava ma totoe. O taumafataga, fa’aaloaloga i toga, tupe ma palapala malo, ia ‘aua ne’i alu alu papa’u le laulau, uma tapenaga pei o le Faaipoipoga i Kana i Kalilaia, ona fesaga’i lea ma puapuagā o le ta’uvalea. E oo foi i faleupolu ma le aufailauga i le va fesaga’i o paolo ma gafa, e filifili i lē ua lava ma totoe le faatofalaiga ma le faautaga fetalai.

O mea e lava ma totoe, o mea ia ua saunia ma le loto lelei, fuafuaga lelei auā a manuia faamoemoega, e ta’uleleia aiga, ma viia ai le Alii o Ia e afua ai lagona ma manatu lelei. O le faailoga foi o le mataala, e tapena faasili, ne’i i ai se tasi e fia maua se fesoasoani.

FTuai: O le Salamo 23 ua faatusa ai le Atua i le Leoleo Mamoe lelei, e lava ma totoe Lana tausiga alofa mo soo se tagata, aemaise i le tagata faatuatua ia te Ia. O loo faamatala manino mai lava i upu o le fatuga, itu eseese o lenei leoleoga e lava ma totoe, a o ola le lafu i totonu o si’osi’omaga o le vao - e lamatia i taimi uma, ma le natura faa-mamoe o le manu e sili ona valea, se’i vaganā ua mātāala le leoleo mamoe. O nisi nei o mau ua lava ma totoe:

E leai se mea ou te mativa ai, i le tino, mafaufau ma le agaga. I soo se tau-vevela o le la, pe mālūlū o le kiona; lagi lelei pe afā. E ui ina o le leona e tupu i manu vaefa, a o le mamoe ua i lalo o le tausiga a le Leoleo Mamoe sili, ua ola i se olaga tautupu ma ona faamanuiaga ua lava ma totoe mai Lona alofa tunoa. Na te ave a’u i le mea o i ai le vao mu’a...tafatafa o vai e tafe lemu, e sa’oloto i taumafa felanua’i e aai ma feinu ma laulelei ai. E i ai nisi leoleo mamoe e ave a latou lafu i soo se vao e tau atu ai, pe magumagu, fefilo i ma titania poo vao talatala, o vao e fefeu, ‘o’ona ma feū. Po o soo se vai e lata ane, e ui ina palapalā pe mātūtū. O taumafa faaleagaga ua mafumafana ma legalegā. E lē faapea le tausiga ma gasegaga a lo tatou Leoleo Mamoe Sili, ua na o mea saunia lelei i taimi uma, e lava ma totoe.

Ou te lē fefe lava i se mea leaga...o lau laau ma lou to’oto’o. Soo se ituaiga mea leaga, o nisi manu fe’ai, po o tagata, po o aitu ma temoni, o le a’e i mauga pe ifo i vanu ma savalia tofē, i le timu ma le la ma pogisa, e leai se toe fefe, popole pe atuatuvaile. O le la’au e faatonutonu ma a’oa’i ai le savaliga a le lafu ia poto ma atamai, e puipui ai le lafu mai osofaiga a le fili, e faitau ai le aofa’i o le lafu a o ui atu i luma o le leoleo ma lalo ifo o lana la’au. O lona tootoo e faalagolago ma malolo i ai o ia, a e sili ai le faalagolago, faamoemoe ma ta’ita’i ai le lafu, e faasino i ai le itulagi e aga’i tonu i ai, e lavea’i mai ai le mamoe ua pa’ū pe utia le vae. E lē na o le pau ia o ana auupega, a e fai lana ‘ato e i ai ma’a, ma le maatā, o le pelu, ū ma le aufana, e lava ma totoe mea faigaluega e leoleo ma puipui ai i tatou.

Ua e faau’uina lo’u ulu i le suau’u - o le u’u e togafiti ai manu’a, faamamate ai ‘utufiti, faamamā ai fulufulu mamoe, faamanogi ai le tino. O le faatusa o le Agaga Paia e liligi ifo ma faauu ai le lafu faatuatua. Ua taumasuasua la’u ipu - e liligi faaua ifo faamanuiaga, e lē faatapula’a pe faatua’oia; o le ipu e asu atu lona masuasua mo isi foi tagata, a e ‘aua le faapito, ‘aua le teu pe ‘u’u mau, ‘aua le taofiofia.

F. Fou: O loo taualuga le Tusi ia Filipi i le faafetai a le au aposetolo, e tusa ma le ma'au alofa, le taulaga tupe, le asiga fesoasoani po o le tausiga a le Aulotu i Filipi, na momoli atu e le sui o le Ekalesia, le taule'ale'a ia Epaferoti. O le faafetai o fa'aalia ai le olioli tele o le loto o Paulo i le Alii, ona o fua lelei o le galuega a le Ekalesia ma le Tala Lelei ia Iesu Keriso - o fua ua lava ma totoe mo le viiga o le Atua. Ua lē ta'ua le aofa'i o le tupe, e lē o le fuainumera le itu sili ona tāua, a o le mafuaaga, le agaga ma auala na faatino ai, ua faaosofia ai le auuana a le Atua, i le foa'i ua faia e lava ma totoe.

O le loto fuatia ifo lelei o le Ekalesia na a'e ai le tofa, e fai se meaalofo mo le auuana a le Atua. O le tali atu a le tagata faatuatua i le musumusuga a le Agaga Paia faama'ite mea lelei. E le'i talosaga le aposetolo mo se fesoasoani, pe na fa'aalia sona atugaluga i le mativa i le itu i le tino. A ua lē manofonofa ai le Ekalesia i Filipi; se a se tali atu i le 'au tala'i, aemaise le Tala Lelei ia Iesu Keriso ua tafi ese ai faafanoga a e saofagā i faamanuiaga o le alofa tunoa? A o sia foi mea itiiti ua latou faia, tau ina faitaulia ai Mu ma Ve'a, Pa'upa'u ia a e oo i Lepea, e tali atu ai i le agalelei silisili ese o le Alii Faaola. Le ituaiga faatuatua lea e lava ma totoe, ua olioli ai le aposetolo.

E iloa gofie i faafanua le mamao o le va o Filipi ma le falepuipui (Efeso/Roma) sa faanofo'esea ai le aposetolo. Pe a manatu i auala o fesootaiga ma femalaga'iga i na ona po, e lē faigofie le āsaina ma le sopo - pei o nai o tatou tua'ā i aso anamua. E le'i soona tu'ulafoa'i foi i se isi, a o le itutino lava o le Ekalesia ia Epaferoti, o ia le foa'i sili ma le taulaga tagata e pa'ia ma mālie i le Atua. Sa iloa lelei foi e le Ekalesia i Filipi, o loo maua tupe a le aposetolo e tausi ai i latou, e ala i le galuega fai fale'ie; a e le'i faitauina e Filipi lea itu. Ma e lē o le taimi muamua foi lea ua alolofa atu ai le Ekalesia. Talu le amataga o le galuega a o i ai i Tesalonia, sa avatu foi meaalofo e atu tasi ma atu lua. E le'i faapea ane, ua lava lona ua uma ona fai le meaalofo. A e maise i aso faigata, e vaai le tagata ia i lona saogalemu, e aputiputi se mea ua i ai mo le manuia o le Aulotu ia. Peita'i ua lē faapea Filipi, ma o le ala fiafia ma olioli lea o le aposetolo, e pei ona faamauina ai e lē itiiti ifo i le faasefulu ona lomina le upu 'olioli'. Ua sāo le faalālelei, ua lē 'ole lea.

O le faafetai a le aposetolo ia Filipi, o le faamauina lava lea o lana viiga ma lana taulaga o le faamanū i le Atua, ona o Lona alofa tunoa ua lava ma totoe mo

ia - i aso o le mativa e tutusa ma aso o le maua o mea, o aso e ma'ona ma faula'i mai mea, faapea foi taimi o le oge. O lana molimau ma le ta'utinoga, na te mafaia mea uma ona o Ia ua faatasi mai.

Faatatau & Lu'itau: Ua faamanatu mai lenei mataupu a le Au Leoleo, i lo tatou ola faatuatua ma lona galuea'iina i lo tatou va feagai ma isi tagata e pei foi o tatou. E lē gata mo le aufaigaluega aposetolo o loo folafola mai le Tala Lelei e fafaga ai lo tatou ola faatuatua, a e faapea foi mo soo se tagata tatou te iloa o feagai ma puapuagā ua tata ai se fesoasoani. Pe a fua foi i le galuega a le Samaria agalelei, na te le'i faitauina po o ai lea ua puapuagatia. O nisi taimi ua tatou iloa o tatou fili ma e ita mai ua feagai ma puapuaga, o taimi ia e fesiligia ai lo tatou agalelei ma le alofa - pe papa'u ma mātūtū i le tau ma sui, po o lava ma totoe e taumasuasua i le faamagalo, faamanuia ma fafaga. O le finagalo lea ma le a'oa'oga a lo tatou Alii.

Ua tatou i ai i aso faigata, ua taugatā le soifuaga talu Faama'i ma Taua ua afaina ai le tamaoa'iga o le lalolagi. Ua aputiputi mea e maua mo le tausiga o le tagata ia ma lona lotoifale, ua faa-pumo'omo'o ai ma le faasoa ne'i lē lava outou ma matou. O le lu'i a le Au Leoleo i lenei masina, ia 'aua ne'i afaina pe pisia lou taumasuasua faaleagaga, ina ua papa'u mea o le lalolagi.

Upu Faai'u: O vavega na faia e Iesu e fafaga ai le motu o tagata, o loo atagia ai le taumasuasua o le alofa tunoa o le Atua e lava ma totoe, mo tagata uma o le lalolagi i soo se auga tupulaga. O le faaolataga e faia i le soifua o Iesu le Alii Faaola, i Lona tino momomo ma Lona toto maligi mai le satauro, e lava ma totoe. O faatusa o 'ato taumafa e 12 na totoe mai le tasi vavega - e faasino i le Manai mai le Lagi e fafaga ai ituaiga e 12 o Isaraelu na muamua valaauina; ma le 7 'ato o taumafa totoe i le isi vavega, e faasino i le Areto o le Ola, e fafaga ai ma Nuu Ese ua aofia ai i le alofa taumasuasua o le Atua. Na faamanatu e Iesu i ona soo nei fuainumera ma tuu i ai le fesili, "*Pe faapefea ona outou lē lagona?*" *Mare.8:21*. Mata o se tali lelei faa Au Leoleo le faamalosi e tatalo i aso uma, ona tatou lagona lea, ma ola ai e tusa ma Lona finagalo, mo le viiga o Lona suafa e faavavau, faavavau lava.

(Faatonu Sulu)

OSIGA FEAGAIGA EFKS FUSI SAFOTULAFAI

O le osiga feagaiga a le EFKS Fusi Safotulafai i le Matagaluega Faasaleleaga, ma lo latou faifeau ia Silipa Faamoetauloga Silipa FS ma le Faletua ia Tagiilima, sa faataunuuina i le Aso Faraile 29 Aperila 2022 i le malumalu o lea lava Ekalesia. O le Faifeau Toeaina o le Pulega Safotulafai, susuga Ioane Viliamu Samoa FT (Fogapoa), sa ia ta'ita'i le sauniga mamalu ma osi le feagaiga i luma o le Atua. O le au mau tofi o le sauniga e aofia ai susuga Sotiaka Roma FS (Lalomalava) sa faitauina le Tusi Paia - Iosua 10:12 - 15, Ieremia 31:31 - 34, o Valaauina Taumua FS (Salelologa) sa saunia Tatalo, o Tonu Mauafu FS (Iva) sa faia le Lauga mo le Faifeau ma le Faletua, ma Esera A. Esera FS (Sapapalii) na lauga mo le Ekalesia i Fusi. O le taimi tonu lea o le faatulafonoina faatapulaa i le 50, o tagata i totonu o malumalu mo tapuaiga; o i latou sa auai na lagiina viiga o le Atua i le ta'ita'iga a le alii Faipese ma le Ta Piano a le Aulotu.

O le afioga i le Toalima o Alii, le tiakono matua ia 'Ae Siaosi na molimau e tusa ma la latou faiga filifiliga. Talu ona malolo penisione le susuga Mafi Faamoe FS ma le faletua ia Seira, sa tausia loa le galuega e le A'oa'o I'u mai Malua, susuga Faasaoina Komiti AM ma le faletua ia Pologa, ma faatali ai le aso e toe saili ai se faifeau. O le faai'uga o le tausaga 2021 sa faia ai loa le fuafuaga, ia tofi le aiga ma la latou sui Faifeau/A'oa'o e fai ai le filiga. Na saunoa 'Ae, o ia na te lē iloa ni faifeau (na ia ta'ua ai le aogā tele o le Sulu Samoa e faailoa atu ai suafa o A'oa'o ma Faifeau o avanoa), a e o le sui lea na fautuaina e lo latou aiga ma sa ia lagolagoina, o Silipa Silipa, lea na manumalo mai le sefulu o sui na faatutū; e ui foi ina sa mulimuli lava i le faasologa o le palota, a e uma ane le faitauga faatolu ua manumalo. Sa tatalo lava ia maua se laolao e faataunuu ai, a o feagai ma Faama'i, faafetai o lenei ua tali le Atua pei ona i ai le asō. Sa tali fuaitau le susuga Silipa e laualuga le faafetai i le Atua mo Lana tofiga e ala i le faatofalaiga a le Ekalesia i Fusi. Sa i'u mai Malua i le 2014, ona faia'oga lea i le Kolisi Maluafou, ma galue i le EFKS Apia-uta lagolago i le susuga Toeaina ia Siolo Tauati FT ma Merita. Ua 7 tausaga 9 masina talu ona i'u ma faatali se valaau mai se nuu, lea na oo atu i le aso 7 Novema 2021. Na faafetaia foi le sao tāua o le susuga Siolo ma Merita ma le Pulega Apia Sasa'e, o matua, aiga ma uo i le galuega, i le tapenaina faaleagaga o i la'ua mo le galuega.

O i latou na valaaulia e fai ma aao taumatau o le Ekalesia Aoao, le Matagaluega Faasaleleaga ma le Pulega Safotulafai e faatalofa ma faafeiloai i le susuga Faafeagaiga ma le Faletua: Leaso Tupa'i KMTA Faasaleleaga/Failautusi KAT, Siolo Tauati KMTA Apia & Tamā faaleagaga o le faifeau, Fiafia Toleafoa FT (Pulega Amoa), Palemia Tauiliili Reupena FT (Pulega Gaga'emauga Itu o Tane, o se lupe faalele a le EFKS Fusi & Tamā faaleagaga o le Faletua), le Ta'ita'i ma le au mau tofi o le Sauniga. Sa auai foi ma molimauina le faamoemoe e le afioga Tiakono Toeaina ia Tuileutu Alavaa TT, susuga Moli Moli FS (Failautusi/Toeaina Faaolioli Pulega Apia Sasa'e), susuga Tesimeta Afamasaga FS (Failautusi/Toeaina Faaolioli Pulega Safotulafai), faafeagaiga o le Pulega, o le vasega MTC 2014, o aiga na lua ma le mamalu o le afioga i Fusi e aofia ai latou lupe faalele ia Elekosi Viliamu FS (Penisione), Dr. Authur Wulf FS (Faiaoga Malua).

O le Lauga mo le faifeau ma le faletua na saunia e Tonu, na matua i le Iosua 10: 12, *“Le la e, ia tumau oe i luga o Kipeona; ma oe le masina i luga o le vanu o Ailona.”* O le Manatu Autu: IA GALUE MALOSI, GALUE MANŪ O AO. Na ia si'i mai le soifua galue o Iosua talavou na soli mulivae i le toeaina o Mose; sa taofia ai le la ma le masina a e se'i fai ia uma lelei le galuega na fia fai e Iosua. Sa faapea foi ona ta'ua le potu masani o le failauga i le galuega i Iva, e fai ma lu'itau mo le faifeau talavou ua sauni e galue, ma lana fautuaga, 'Afai e lē o leaga, 'aua le suia fua. O le Lauga mo le Aulotu na matua i le Ieremia 31:33, *“O lenei le feagaiga ou te osia ma le aiga o Isaraelu”* O le Autu: O LE OSIGA FEAGAIGA FAALE-ATUA, O LE OLA AI. O Isaraelu le nuu sa mapo feagaiga, a e mata'utia le soli feagaiga, ma fetaita'i ai ma puapuaga ogaoga ona sa le'i ola ai. Lea ua faailo e Ieremia aiaiga fou o lea feagaiga, pe a oo ina afio mai Iesu ma le Tala Lelei. Na faamanatu e le failauga ia Safotulafai ma lona tofiga faa-Puleono, ina ne'i mapo pule; o le feagaiga ua osia nei, o le feagaiga faa Tala Lelei, e ao ona fa'aaloologia ma faamamalu e le aganuu. Na ta'ua e le Toeaina le aufaigaluega ua muamua atu, o Mafi, Palale, Petaia, ma le fautuaga ia galulue loto maulalo, ma fai mea faalogo i le faasinoga a le Agaga Paia. Ia manuia la outou galuega fai faatasi.

TUSI FAITAU ASO IA APERILA

VAIASO 3 - 9/4: TALA LELEI A LUKA (3)-1 MALAGA I IERUSALEMA

ASO SA 3/4: O LE SAVALI O LE OLA

“³¹Faauta, o le a o a’e i tatou i Ierusalem, e taunuu ai o mea uma ua tusia e le au perofeta i le Atalii o le tagata. ³²Auā e tuuina atu o ia i nuu ese, e faatauemuina, e faaleagaina, e feanu foi i latou ia te ia, ³³latou te sasa foi ma fasioti ia te ia.” Luka 18.

O tagata faimalaga e o a’e i Ierusalem latou te lagi tauloto ‘Pese ma e o a’e’ mai le Tusi Pese Eperu, o loo tusia ai le tele o fili mata’utia i le ala, mai le oso a’e o le la i le ao, se’ia oo i le goto ifo o le masina i le po. E faapea foi i puapuagā e lama le fili, e fāufāu mea leaga i le au malaga. A o loo i ai pea fitā o maa tui ma maa faalāvea aao i le ala, ma le lamatia e manu fe’ai e osofā’i. A e o nei fili mata’utia uma ma faalavelave faafelavei, latou te mafai ona faaliliuina ese pe faasesē le tagata malaga. O fili e ala mai i tagata po o manu e lē mamā e pa’i i ai le au malaga, ma lamatia ai i le ta’u lē mamāina mo tapuaiga ma osiga taulaga o faamoemoe atu i ai. A e lē faitauina ai tagata saili avanoa e fai sauaga ma auala pi’opi’o, pei o ao lafoga latou te faae’e lafoga mamafa i tagata faimalaga mai, mo a latou faasiliga. O nei faafitauli eseese e taumafai le tagata malaga e fō’ia - e leitioa a latou pepese: ‘*O le Alii o lou leoleo ia*’, ‘*Ana lē seanoa le Alii nai ia te i tatou*’, ‘*O ē faalagolago i le Alii e faapei o le Mauga o Siona i latou!*’

A o malaga a’e Iesu i Ierusalem, sa fetia’i foi o Ia ma le tele o fili, o mailei ma to’atūgā i le ala. Peita’i sa le’i vaai i ai le Alii o ni faafitauli, pe sa taumafai o Ia e ‘alofia, a e sa ia faafetaia’i ma faafeiloa’i i ai, i Lona silafia o i latou foi ma lo latou fesoasoani, e mai le Alii lea! Ua na o lo tatou faafeiloa’i ma faafetaia’i i le lalolagi ma ona lu’itau e tele o loo si’osi’omia ai tatou, e mafai ai ona tatou faapea ane foi i tatou, “*³³Ua faia e le Alii mea tetele mo i tatou!*” *Sala. 126.* E ui ina o le malaga o tatou faia nei, e tumu i tiga ma puapuaga, a e o le malaga lava ua mautinoa lona taunuuga manuia, e olioli ma filemu. Auā ua uma ona faatoilaloina e Iesu fili uma, e oo i le oti ma le tuugamau, e ala i Lona maliu tiga i le satauro ma Lona toetu manumalo. Manuia lau faiga malaga o faia faatasi ma le Ta’ita’i Malaga i lenei soifuaga.

VAIASO 10-16/4: TALA LELEI A LUKA(3)-2 VAIASO PAIA - UA AFIO MAI LOU TUPU

“⁸Ua iloa atu e Herota ia Iesu, ona fiafia tele ai lea o ia; auā ua leva ona fia matamata ia te ia, ona o mea e tele ua logo mai ia te ia; ua faamoemoe foi o ia na te vaavaai i se faailoga e faia e ia.” Luka 23.

O le ā se mea e tupu, pe afai e tau’a’aoina mai mo i tatou i luga o se ipu mafolafola siliva, le mea ua leva ona tatou moe miti i ai e fia maua? A e faapefea pe afai e oo mai lea taimi, a e lē saunia i tatou e talia lona moni, e tali lelei lea avanoa? E faapefea pe afai na o le faate’ia o i tatou, e ofo ma segia le mauili, pe lē talitonu ona o lona ofoofogia, ma lē iloa tonu ai pe se ā e tatau ona fai? Ua leva ona fia vaai le tupu o Herota ia Iesu le Tupu o tagata luitaia. Ua leva ona ia faalogo i tala ‘a’ave mai o vavega tetele ma le ofoofogia sa faia e Iesu, sa faaolaina ai le toatele. Sa fiafia o ia ua maua le avanoa e vaai tino ai i lenei Tupu, ma vaai ai i se vavega po o se faailoga e faia e Ia. Na ia maua le avanoa o loo fia maua e tagata uma, peita’i na te le’i fa’aaogāina lelei. Na māumāu le avanoa, ua na melea le avanoa fa’aauo o le olaga atoa, le avanoa e feiloa’i ai ma Iesu, e vaai, talia ma talitonu ai ia te Ia, e faaolaina ai lona agaga, ma lavea’iina ai o ia mai le faafanoga i le lepa afi e faavavau. O le upu moni na te lē mafai i sona paoa faa-tupu o Roma, ona toe suia le fuafuaga ua uma ona faataatia e le Atua, e ui ai le Atalii o le Tagata mo le faaolaina o le lalolagi; e leai se mea e tasi a Herota, po o Pilato po o ai lava, e toe suia ai le auala o le satauro. Peita’i, e mafai ona faaolaina le agaga o Herota, pe ana feiloa’i ma Iesu, vaai ia te Ia ma talitonu o Ia moni lava o le Tupu o le lalolagi - le faailoga na ia faamoemoe i ai.

E i ai i latou sa soifua mai i le taimi na fai ai le galuega faaola a Iesu, o i latou na latou maua le avanoa e feiloa’i ai ma le Tupu o tupu, ma suia ai o latou olaga ina ua talitonu ma faatuatua ia te Ia. Amuia i latou! “*²³Amuia mata ua iloa mea tou te iloa; ²⁴auā e to’atele perofeta ma tupu na fia matamata i nei mea ua outou iloa, a ua latou lē iloa lava; na latou fia faalogo foi i nei mea ua outou faalogo ai, a e lei faalogo ai lava.*” *Lk 10.* A e talofa foi ia i latou pei o Herota, na maua avanoa e feiloa’i ma vaai ia Iesu a e le’i faia ai se suiga i o latou olaga. O se a’oa’oga tele mo tatou mai lenei vaega o le tala i le Faamasinoga o lo tatou Tupu, ina ia tatou fa’aaogā tatau avanoa uma e aumai e le Atua. Ma ia matala pea o tatou loto e afio mai i ai lo tatou Tupu.

FAAMAGALOGA O SE FAAI'UGA,
A E LE O SE FAALOGONA

“³⁴Ona fetalai atu lea o Iesu, “Lo’u Tamā e, ia e faamagaloina atu ia te i latou; auā ua latou lē iloa le mea ua latou faia.” Luka 23.

O le ulua’i fetalaiaga a Iesu mai luga o le satauro, o le tatalo i lona Tamā ina ia faamagalalo. O lana lea a’oa’oga, o lana masani ma le amio, o lona natura pa’ia; o le faai’uga ua leva ona filifili i ai, ua faaleo atu i lona Tamā ina ia alofa faataunuu. Fai mai se tasi a’oa’o su’esu’e o le Tusi Paia, o le faa-Eleni o lenei tatalo o loo faailo ai, sa le’i faia na o se taimi e tasi, a e sa fai fai soo, i le va o le itula e 9 - 12. O ona faalogona i lea taimi, o tigā matuitui i lona tino, mafaufau ma lona agaga. A o lana filifiliga ma le faai’uga e tali atu ai i nei tiga: o le faamagalalo. O ai i ‘latou’ e faamagalalo? O fitafita na tutu’i ona ‘a’ao i fao, faapale o ia i le pale tuitui ma sasa i lona tino, o i latou na feanu ma faatauemu, na valaau ‘Ina faasatauro ia te ia’? O Pilato Herota & Kaiafa, o le fono a le Saneterini, o Parapa ma le isi pagotā na tauemu a o tautau i ona tafatafa? Faapefea Iuta le faalata, Peteru le faafiti, o soo na sosola tuulafoa’i na o Ia? Fai mai Peteru i le Aso Penetekoso, *“²²Outou Isaraelu e, o Iesu o le Nasareta...na outou faamau i le laau ma fasioti...” Galu.2,* a e mulimuli ane, *“⁵o alii ma le au toeaina, ma le au tusiupu, ⁶ma Ana le ositaulaga sili, ma Kaiafa, ma Ioane, ma Alesana ma le aiga o le au ositaulaga sili. ⁸Ona fai atu lea o Peteru..ia iloa e outou uma, atoa ma le nuu uma o Isaraelu, o le suafa o Iesu Keriso o le Nasareta, o lē na faasatauroina e outou..” Galu.4.* E fai pea le lisi o i ‘latou’ seia oo mai ia te a’u ma tatou uma, *“²³Auā ua agasala tagata uma lava, ma ua lē oo i le mamalu o le Atua.” Roma 3.*

Sa talia le tatalo a Iesu ina ia faamagalalo i ‘latou’. E faapefea ona faamaonia ua talia le tatalo ina ia faamagalalo? E limasefulu aso mulimuli ane, *“Ona papatisoina lea..ua faaopoopoina ai pe 3,000(Galu.2:41), 5000 (4:4), ua matuā faatoateleina le au soo i Ierusalem; ua anaana foi ositaulaga e toatele lava i le faatuatua (6:7).* E oo mai i le tausaga 60 TA, ua oo le Tala Lelei i Atenai, Roma ma Asia Itiiti. E ui ina sa faaleagaina

le aai o Ierusalem i le 70 TA, a e ua lava lea taimi talu mai le Aso Penetekoso e faalogo ai i le Tala Lelei o le faamagalogo o agasala ma faaolaina ai le toatele. O i latou sa mana’omia lea faamagalogo na latou maua, *“²³E saili mai outou ia te a’u, tou te maua foi” Iere.29.* A o ai sa i ai i Ierusalem i le taimi o lona faasatauroina e le’i faaolaina, e mafua i o latou lava loto ma’a’a, (Sala.81:11-12, 95:8, Mata. 19:8). Ne’i tau le pua ma lafo, pe tagofia le fasilaau i le mata o le isi uso, a o tatou uma lava e aofia i le suinauna ‘latou’; o tatou uma foi na maliu ai o Ia, *“Ua manu’a o ia ona o a tatou solitulafono, ua momomo o ia ona o a tatou amio leaga; o le a’oa’iga e filemu ai tatou sa i ona luga lea, o ona faalavalava foi ua malolo ai tatou.” Isa.53:5. ‘auā ua latou lē iloa le mea ua latou faia’*

O le ā le mea na fai ma le lē iloa? E i ai i latou o Iutaia sa latou iloa o Iesu o le Mesia, faatasi ma tagata nuu ese sa latou silafia o Iesu le Keriso, o le Alo o le Atua soifua; peita’i na latou fasioti lava o Ia ma le loto i ai. A e toatele foi e na latou faatino ma aafia ai, sa faia ma le pogisā, sa le’i malamalama i lona tulaga tau Atua, a ona o le usita’i i o latou ta’ita’i, na faatino ai o latou tiute. Atoa ma le toatele o Kerisiano uma e oo mai nei, e faapea ane tatou te le’i auai i lea auga tupulaga na faasatauroina Iesu. A e tutusa i tatou uma, i lo tatou fai o le agasala ma le lē iloa. O le ā le agasala? *“O le agasala, auā ua lē faatuatua ia te a’u.” Ioa.16:9. “O a outou amio leaga ua fai ia ma pupuni i le va o outou ma lo outou Atua” Isa.59:2.* O le agasala, o le lē usitai i soo se mea leaga e va ai le tagata ma le Atua, i lana tautala, amio, faatino, mafaufau, loto, agaga. O le mea lea o loo taumafai ai le tiapolo i taimi uma, ia tatou faia mea sesē ma leaga, e fai ma le lē iloa, lē malamalama, lē manatu mamafa i ai, lē tusa ma le finagalo o le Atua. E ao ai ona tatou tatalo faamalosi, mataala i taimi uma, mafuta ma le Atua ma saili i ana afioga paia e lē aunoa. Ua faamanatu mai e Luka i lenei Aso Maliau, le ogatotonugalemu o le Tala Lelei ia Iesu Keriso - o le faamagaloina o agasala, e ao ai ona tatou faafetai ma vivii pea lava pea i lona alofa. Ua faamanatu mai foi lo tatou tiute faa-tagata faamagaloina, ina ia faapea foi ona tatou faia i isi tagata, aemaise i tagata agaleaga mai. Ma ia ‘aua tatou te manatu faatauvaai i soo se mea itiiti tatou te fai, e ono afaina ai lagona o isi uso, ma afaina ai le va tapuia ma lo tatou Atua. Manuia le Aso Maliau.

O LE PEROFETA MULIMULI

(O le Tala faa-fugogo faasolo ua faa-Samoaina mai le tusi, The Last Oracle, tusia e James Rollins)

O latou tua atu, na taia ai le faitoto'a e se mea mamafa, soso'o ane ai ma le ōu leo tetele a ta'ifau. Na lagona le tauvala'au a nisi tagata o loo tuliloa atu i latou i lalo o fasitepu.

“Pe mata o ni ta'ifau sosogi i pomu?” na fesili ai Elisapeta. “E lē iloa pe moni lava le taufaamata'u o le pomu.”

O le paga a Karai o Koualasaki sa tomumu, “Na o se pomu tau-faamata'u lava i autafa o Piesa o se mea lelei.”

Ina ua taunuu atu i lalo o fasitepu, na latou tau atu ai i se pa o loo loka. Na ave ese e Karai le u'amea na loka ai ma tatala le pa. Sa fetoso ālavai i itu uma e lua, sa pogisā pato'i, o loo manogi pea le simā e le'i mago lelei ma tau musumusū ai tulutulu o vai o sisina. “Talosia o loo aumai e se tasi se mōlīuila,” o le tala lea a Koualasaki.

Na tomumu lēmū Karai ia te ia lava; ua tuu le mōlī i le potu teu oloa. Na autago solo Elisapeta i lana taga ma aumai lana afi tutu tapa'a. O se meaalofo anagatā lanu siliva ituaiga o le Dunhill. Na ia tatala ma tutu, mumū ai sina aloiafi itiiti. Na ia fetu'una'i le ola o le afi i lona poto masani.

“Manaia tele. Maimau pe ana aumai sa'u sikā.”

“E faapena foi a'u,” o le tali atu lea a Elisapeta.

Na faanatinati atu Koualasaki i le mea o i ai Elisapeta. A e le'i fai atu sana tala, na faate'ia i latou i le susulu mai o le malamalama i fasitepu i o latou tua. Na tatagi leo tele le sailini o faalavelave faailoilo. Ua sopo mai le faitoto'a o i luga i latou o loo tuliloa mai.

“Faanatinati.” Na liliu Karai i le itu taumatau. “Faalatalata mai.”

Na pipi'i atu Elisapeta i le tau'au o Karai a o Koualasaki o mulimuli atu ai. Na tu'u maualuga e Elisapeta lana afi tapa'a. Na o sina malamalama itiiti sa susulu i luma atu. Na si'ivaelua atu Karai i le ālavai, o le tasi ona lima na si'i i luga, ma ona tamatama'i lima na faasolosolo i le va o paipa i luga a'e. Na ia uia le ulua'i lālā na latou tau atu ai, ina ia latou lilo ese ai mai le fasitepu.

O se ōu leo maualalo e tasi na latou lagona lona i'uleo. Na 'u'una'i atu e Karai la latou sola'aga i se tamo'ega.

Na lelea solo le ofu faigaluega o Elisapeta. O lana afi tutu tapa'a na mū atu ai ni apogaleveleve a o latou taamilo saosaoa i se isi pi'oga.

“O fea a tatou o i ai?” o le fesili lea a Koualasaki.

“O ese,” o le tali atu lena a Karai.

“O le fuafuaga tele lena? O le o ese?”

Na mapuna a'e i luga le ōu ōu tetele o ta'ifau. Sa fe'ei a'e foi ma nisi sa tauvalaau. Ua maua e tagata la latou auala.

“Faagalo la'u tala na fai atu,” na faasa'o atu ai Koualasaki. “O lena e lelei le o ese ia te a'u.”

Na latou tau fetuli fufusi faatasi i totonu o le lavelave o ālavai.

O le vaeluagalemū o le aai i le isi itu, o loo nofo saofa'i ai Iuri i lalo o le paolo o se laau fua suamalie. O se faalogoga mālū le nofo i lalo. Na iloga le tigā o ona tulivae, o le itu foi i lalo o lona tua sa tau osooso mai lona ma'ema'e. Na fai lana inumaga e fa fuālaau Aleve na folomago talu ai. I lona aiga, e malosi tele le inumia o ana fualaau, peita'i e sa ona aumai se mea i le Unaiete Setete. O se mea manaia pe a toe foi i le Uareni. Na faaloloa le isi ona vae ma fōfō lona tulivae.

A o ia mālōlō, na faasolo ina goto ifo le la ma faatupu paolo uumi i totonu o le auala o le fanua mo tafaoga. Pe tusa ma nai sitepu i le isi itu, sa i ai se pa simā maualalo sa tuaoi ai le auala i le isi itu. Sa laina faasolosolo ai mātua ma fanau i pito o le pa, ma faasinosino i lalo i le siosiomaga ma mea o feoa'i ai i tala atu o le pa. O se vaega itiiti o laufanua vaomatua o Saina sa fausia ai: o se laufanua ma'ama'ā ma vaoa, o fausia ai ni ana, o ni vaitūloto ma vaitafe.

Sa teuteuina ona itu malifa faa-tifatō i vao, faatasi ai ma laau faalo'ulo'u fetagisi, o laau ituaiga aoa pa'u mafiafia, ma le tele o ituaiga 'ofe. I totonu o lenei si'osi'omaga, sa i ai ni urosa tetele se lua, ituaiga taufulufuluua lanu papa'e ma faalava uli o le panda, sa nonō mai Saina – sa faaigoa ia Mei Xiang ma Tian Tian – sa tosina i ai le fiafia o i latou sa totoe, sa asiasi mai i le Pa Manu.

E aofia ai ma Sasa.

Sa tu le teine ma pi'ilima i luga o laugutu o le pa ma'a. O le tasi ona seevae sa taimi lelei le faaluelue ma taia i le simā. Sa faasolo ina fāi ifo mālie.

E pei ona sa faamoemoe i ai Iuri.

Na aumai e Iuri le teine iinei i le Fanua o le Malo mo Manu, ina ua uma lana feiloaiga ma le faatinoga ia Mapoletope. Mai le poto masani i mea ua uma ona tutupu, ua na iloa ai le tele o le sao ma aafiaga mafanafana o manu i ana sui molia. Aemaise lava ia

Sasa. E le'i manaomia e Iuri se su'esu'ega faapitoa e iloa ai le tulaga o i ai sua o le tuasivi o le teine. O le mae'a ai o taualumaga faasolosolo loloto, na siitia maualuga ai i se tulaga lamatia, o hormone o le fai'ai o le teine. E le'i saunia i ai o ia mo lea tulaga. Na faate'ia o ia faamanupō'ia i ofaga i le faatinoga a le teine, ma o lea na ia iloa ai ua tataua ona vave faato'a filemū ma faato'a mālie ia te ia. O le mamao ese o ia mai le si'osi'omaga o lona aiga, o le a afaina tele ai lona soifua ma faigofie ona lamatia i aafiaga eseese, mata e faaleagaina tumau ai neura o lona tino e lē mafai ona toe faaleleia. Na ia vaai i ai muamua. E faitau sefulu ma ona tupu tausaga a e faato'a latou maumautai le fesoota'iga vāvālalata o mafaufau o tamaiti e i ai mana'oga faapitoa, ma o latou feumiaiga ma manu.

O le ala lea a o faasaga le alii o Mapeletope i lana su'esu'ega i le fale mataaga o le tala faasolopito o le natura, a e ave e Iuri le teine o Sasa i le fanua ma le lotoā ta'uta'ua o manu i totonu o le aai. Ua tusa lava ma le faigofie ona lafo o se feau tusitusia.

Ua saga faateletelegese le kiki tātā o vae o Sasa. Ua sosolo ifo i lalo. A e o loo ua matuā afaina lava le tamatama'i vae o lona seevae pa'u. Peita'i e sili ai ona o se'evae a e lē o lona mafaufau.

Na faalogoina e Iuri e pei ua faasolo ina matala atu se faapona sa nonoa i le va o ona tau'au. O le a faasolo le teine i le isi malaga a le vaalele e foi i Rusia. E taunuu loa i le Ualeni, tapena loa o ia mo se su'esu'ega mae'a o lona tino: o le toto, o fe'au vai (tulou), ma se fā'ata faapitoa o lona fai'ai. Ia mautinoa e leai se itu tino o faaleagaina.

A e sili ona tāua, na te fia iloa se tali pe aiseā pe faapefea ona mafai e le teine ona ia faasolo se polokalame na o ia. Sa lē tataua ona tupu lena mea. O totoga faapipi'i i le mafaufau sa tumau laasaga lelei o faaosofiaga, e pei ona su'i i le gafatia o soo se tamaititi. O le faatinoga na molimauina sa fai e Sasa i le ofisa o Mapeletope sa lē tataua ona tula'i mai, se'i vaganā o ona totoga faapipii sa faatonutonu atu i se isi nofoaga ese ina ia faaosofia ai lona tali atu.

O le ā la le mea na tupu? Sa i ai se faalētonu i ona totoga faapipii? Sa i ai se isi tagata na ia faaosoa? A e sili ai ona lavelave, pe mata o Sasa sa tupu ma sili atu lona malosai nai lo le avega a latou sa faatonutonuina atu?

E ui ina vevela le aso, a e sa ia lagona le maalili.

E i ai se mea o faalētonu.

Na lagona atu le maoga a'e o le pisapisaō mai o tagata i ona luma atu. Sa sau mai le faapotopotoga

na matamata i fa'aaliga a urosa. Na faateleleina le leo malomaloā. O meapu'eata sa fe'emo solo, ma sa toatele ua saga faaopoopo atu i ai. Na lagona atu e Iuri se igoa o ta'u soo ma tauvalaau pea lava pea. "Tai Shan... Tai Shan..."

Na faasa'o a'e i luga le nofo a Iuri ma uisa i le tiga o lona tua. Na ia maitauina le igoa o loo tauvalaau, mai le pepa faalauiloa a le pa manu. O Tai Shan le pepe urosa na fanau mai ia Mei Xiang i nai tausaga ua te'a. Ai ua tafao fealua'i mai i fafo ma iloa atu ai e tagata. Sa fetuami atu tagata ia iloa manino atu le urosa pepe. Ua faaopoopo atu isi tagata. O tamaiti sa tasi'i e latou matua i o latou tau'au e faa-matamata. Ua fe'emo solo mea pu'eata. O lona ita i le soona vevesi solo o tagata na ia tu a'e ai i luga. Ua na lē iloa atu Sasa i le tumu o tagata. Na ia iloa e lē fiafia le teine pe a pa'i atu pe tago atu se isi ia te ia.

Na la'a atu Iuri kolosi le auala ma tautūlei atu i totonu o le tumu o tagata. E toe itiiti ona tapuni lea o le pa manu. Ua oo i le taimi ua tataua ona tuumuli.

Na taunuu atu o ia i le itu o le pa sa tu ai Sasa. Ua leai se isi. A o tātā malosai lona fatu, na ia saili solo i itu uma o le pa. Sa le'i iloa atu foliga o lona lauulu uliuli pato'i ma ana lipine mūmū. Na ia toe solomuli ma tau pa'ū mai i tua, feto'ai ma taso'a tau'au o isi tagata a o ia tautūlei i o latou va. Na tomumumu le to'atele ma faaseā i lona lē migao. Na pa'ū le meapu'eata a se isi ma ta'e i le auala.

Ua te'i i le 'u'u e se tasi o lona tau'au. Na lia'i ma tūlei o ia.

"Sole, e lelei pe afai e i ai sau –"

Na lūlū e Iuri lona tau'au ma ia mamulu ese. Na fetau le pupula atu o ona mata sa manino i le fefe, ma foliga o le tamaloa e sili atu ona lapo'a ia te ia. "O si o'u... afafine. Ua leiloa lo'u afafine."

Ua liua le ita i le atuatuvaale.

Na vave salalau atu le tala auā sa faatumulia i mātua ma latou fanau. O se tulaga e lē fia oo i ai soo se matua. Ua amata ona saputu ane fesili. E faapefea ona foliga? O le a lona 'ofu sa fai? Sa ofo atu e nisi upu faalototele, faamafanafana e toe maua lava o ia. Sa le'i lagona e Iuri nei mau tala, atili i le tātā leo tele o lona fatu. Sa lē tataua ona ia tuua le teine na o ia toatasi, sa lē tataua ona ia nofo i lalo.

Sa faasolo ina faaititia tagata i ona autafa, ma ia iloa atu ai soo se itu.

Na ia liliu solo ma faataamilo. Na saili pea, peitai na ia iloa le mea moni ua tupu.

Ua leiloa mo'i lava Sasa.

“Le faitoto’a!” na ‘e’ē atu ai Koualasaki mai tua. Na tu faafuase’i Karai ma tilotilo atu i ona tua. Na tu’u ane e Elisapeta lana afi tapa’a ma iloa ai se faitoto’a itiiti, o loo natia tusa e lua sitepu mai le ālavai pogisā. Na pāsia e Karai i lona alu i le atoa, ma le mua ona ia tulimata’i le tauluga o alavai, mo se faitoto’a e sao atu i luga i le auala tele.

O latou tua atu, sa tauvalaau mai ai tagata o loo tuliloa mai i latou. Na lagona le ōu mai o taifau, ua maua e le ‘au saili le auala o latou ui ai. Sa taamilomilo solo Karai i alavai ina ia leiloa atu ai i latou, peita’i e le’i manuia, ma ua lalata mai le ‘au saili.

Na taunuu Koualasaki i le faitoto’a ma taumafai e mimilo le ‘au e tatala. “O loo loka.” Na ia tu’i le uamea i lona atuavale.

Na oo ane Karai i lona itu, ma iloa atu ai se ki-loka faa-elekotoroni i lalo o le ‘au o le faitotoa. O le mumū o le afi tapa’a na iloa atu ai se faailoilo uamea itiiti o tusia ai i mata’itusi teuteu:

FALE MATAAGA O LE TALA FAASOLOPITO O AMERIKA

O le faitoto’a leni i lalo e ui atu ai i se tasi o vaega o le falemataaga o le Faalapotopotoga o Simifisone. O Elisapeta sa pito i le faitotoa, na ia faasosolo lana pepa faasinomaga i le ki-loka faa-elekotoroni, a e na pogisa pea le loka. Na faamautinoa e Koualasaki i lona tulei o le ‘au ma lūlū lona ulu.

“O la’u pepa e lelei na o le fale mataaga lautele,” o Elisapeta lea. “A e sa ou faamoemoe –

O se ōu fe’ai leotele na faate’ia ma latou fāliu faataamilo ai. Sa iloa atu le faasolo ina mumū malosi mai mōlūiila i le isi pito o le ālavai.

“Ua tatau ona tatou gaioi,” na fai atu ai Koualasaki ma la’a ese mai le faitoto’a.

Na pa mai se fana. Na emo se aloiafi i le laualuga u’amea, na tau tonu i le mea sa tu ai Koualasaki i nai sekone talu ai. Na fe’emo solo pulufana salalau i le fola simā, feula mai ai ma ’aloiāfi eletise lanu moana. Na siva ese mai ai Koualasaki, pei o se elefane o sola ese mai se loi. Na maitau atu e Karai le avega pulu: o le ituaiga Taser XREP. Na amoti mai se fana faatulagaina utu-sefululua, le auupega ū-fanafana o loo utufia i se vailaau faate’i maso. E mafai ona ia faalaloina se kolila mai mauga.

“O SIKULAKĪ NEI O LE MALO! TAOFI, A LEAI O LEA TOE FANAATU!”

“O lea ua latou lapatai mai tatou,” na fai atu ai Koualasaki ma si’i ona lima i luga o lona ulu.

O punitia i tua ane o lana paga, na fāliu atu ai Karai ma faasosolo lana pepa faasinomaga Sikima uliuli i totonu o le ki-loka. Na filiki mai sina emo lanu meamata i tafatafa o le loka.

Faafetai i le Atua.

“LIMA I LUGA O LE ULU. TOOTULI I TULIVAE!”

Na tago atu Karai mimilo le ‘au o le faitotoa, ona matala lea i sina vā. Sa pogisā atoa tala atu. Na ia a’apa atu i tua u’u le tulilima o Elisapeta ma toso mai. Na ūisa le tamaita’i, ona ia iloa atu lea o le faitoto’a ua matala. Sa faapea foi ona ia tago ane ma u’u mai le pito i tua o le fusipa’u o Koualasaki, o sisi’i pea ona lima ma faatū i lalo. Na ia tepa atu i le isi toalua. Na taia e Karai le faitoto’a i lona tau’au ma matala atoa, ona ia toso atu lea o Elisapeta faatasi ma ia. Na maua lē paleni Koualasaki ma tafiti ai i le isi tulivae – ona tulei ese lea o le faitoto’a ma puna oso mulimuli atu i fafo. Na lagona e Karai le isi pa mai o le fana. Na taia i laua e Koualasaki ma la’ua autafiti atu ai i sitepu pogisā i tala atu. O le isi vae o Koualasaki na ia kiki ai le faitotoa ia toe tapuni – ma saga kiki. “– tou pona –!” na ia auē atu ai i le va o nifo o loo ū. Na iloa atu e Karai le iila mai o le nila sa lālā mai i le seevae o le tamaloa, o lona vae sa mimigi. Sa iloa atu foi e Elisapeta. Na a’e atu o ia i ona luga, oomi i lalo lona tapuvae, ma nuti pala soli ese le atigi pulu Taser i lalo o lona seevae. Na toe migi tasi le vae o Koualasaki ona uma lea. A e le’i uma ai lona palapalauvale. Na aapa atu le lima o Karai e faatū o ia i luga. “Ua e laki na tau le pulu i lou seevae. O le pa’u o le seevae na matatupa ai le nila mai le tuia o totonu o lou vae.” “Laki!” Na punou ifo Koualasaki ma ōloōlo tui i pa’u o ona seevae ua polesi. “Ua faaleaga e tagata o’u seevae Siuka fou.” Sa lagona atu le tauvalaau a tagata ua lata mai i le faitoto’a.

“Tatou o,” na tauanau atu ai Karai ma savali loa.

Sa tomumu pea Koualasaki a o latou femo’ei i luga o sitepu. “E faatau e Koloue la’u pea seevae fou!” Sa le’i amanaia e Karai a o ia tamo’e saosaoa i luga. Sa fa’aauau le gugulu o Koualasaki. “Tuu ai le ulupoo o le manukī i lalo iina. Tuu ai lena mea ma latou.” “Leai!” sa tau fai fe’ei faatasi mai ai Elisapeta ma Karai. Na lagona e Karai le toatamai i le leo o le fafine. Sa tutusa ma lona foi ia. Na oti si ona tamā ona o le puipuia o le ulupo’o mai tagata sa sailia. Na oti i lima o Karai. Sa mamao lava lona manatu e si’ilima.

(Sosoo atu i le Sulu Samoa Me 2022)

NA O AFIGA E TULEI MAI FOFOGA O LE ALII

OLE TOE TU LUGA

“¹⁶Auā e atu fitu ona pa’ū lē amiotonu, a e toe tu o ia; a o e amio leaga, e pa’u’ū i latou i le malaia.” Faataoto 24.

Pe a tatou maitauina le tamaitiiti o tau faamasani i lana savali, tatou te iloa ai o se vaega tāua o lenei taumafaiga, o le pa’ū i lalo. O le toe tu a’e i luga, e maua ai lona poto masani ma le malosi e faapaleni ai lana tu, ma e tutupu ai foi maso o ona vae. E faapena foi i le taaloga lenei o le fusu’aga. E lē faalēaogāina se alii/tamaitai faipelē pe afai e pa’ū i lalo; faato’ā faalēaogāina ma faia’ina, pe afai e lē mafai ona toe tu a’e i luga. E tapena alii ma tamaitai fusu ma le iloa e i ai le taimi e pa’ū ai i lalo, o le ala lea e a’oa’oina ai ina ia silasila lelei mo le saogalemū pe a pa’ū, ma ia vave ona toe tu i luga. E tutusa tamaiti pepe ma tama fusu i le a’oa’oina o lenei: e faalagolago mea uma i le toe tū i luga.

Ua ta’u mai e le Tusi Paia, o le pa’ū i lalo e tāga tutusa ai le tagata amiotonu faapea foi ma le tagata amiolētonu. A o le toe tū a’e i luga, o iina e iloa ai le eseese. E pei ona faauiga le Faataoto 24:16, A pa’u’ū tagata amio lelei, e toe tutū i latou i luga; a e afai e taia tagata leaga, o le muta’aga foi lena o i latou. O tagata amiolētonu e taatitia ai pea i lalo – o le amiotonu e toe tula’i, ma alu pea i luma.

Ua tatou iloa foi mai le Tusi Paia nisi o auuuna ta’uta’ua a le Atua, na latou pau’ū ina ua toilalo i o latou olaga. O Aperamo na pepelo ma le mautinoa ia Farao, ona o lana avā o Sarai (Kenese 12:11 – 17). O Iakopo na ia olegia lona tamā o Isaako ma gaoia le tofi o le ulumatua o lona uso o Esau (Kenese 27:17 – 29). O le ita tele o Mose na ia lē usitai ai i le Atua e ala i le tāina o le papa (Numeru 20: 7 – 12). Ui i lea, e le’i faalēaogāina i latou, a e fai mai le tusitala ia Eperu 11, *“³⁹O i latou uma ia o e na ta’uleleia ona o le faatuatua.”* E faapefea ona tupu lea mea? Auā sa latou ta’utino o latou sesē ma agasala, ma latou maua le faamagaloga a le Atua. I nisi faaupuga, na latou pa’u’ū, a e na toe tutū i luga. Ma e faapena foi oe ma a’u ma tatou uma, e mafai foi ona tatou toe tutū. O le vaega ‘faatuatua’ lena o la tatou savaliga. O le tumau ai i lalo, o le toilalo ua taliaina – a o le toe tū i luga, o le faatuatua ua galueaina! Tū nei loa i luga, ua lava lena taatia.

AUALAE LAVEA’IINA I LE PA’Ū SOO

“⁵O le ua faia ia mea e lē faagaetia lava ia e faavavau.” Sala.15.

O le mau a le Tusi Paia faapea, *“¹O le tagata ua a’oa’iina soo, a e faama’a’a lona ua, e faafuasei ona nutimomoia o ia a e leai se fofō.”* Faata.29. Ua talitonuina o Solomona, le tupu e sili ona poto i tagata uma e soifua mai le lalolagi (vagana ai lo tatou Alii o Iesu), o ia na tusia upu nei; a o le faanoanoaga sa le’i mafai ona ia savali ai e tusa ma ana upu, ma i’u ai ina ‘pa’ū ma mū’. Pe afai sa tupu ia Solomona le poto, e faapena foi ona leai se tasi e sao mai ai. O le amio ua avea ma tulaga taualoa i soo se vaega o le soifuaga, auā ua tele nau nau ta’ita’i faale malo ma faiga faa-polokiki, i pisinisi ma atina’e, ua oo lava i le lotu ma Ekalesia, ua pa’u’ū ma toilalo ona o le amio. O le avea o oe ma ta’ita’i e te galue ai i le lautele, a e lē faalilolilo pe faapūmoomoo. E toatele tagata e a’afia ma afaina i au mea e fai, ma pe afai e te pa’ū ifo, e toatele tagata e afaina ai. Pe afai e pa’ū le laau o le aoa tele, e afaina atu ai ma le tele o tama’i laau i lona alu ifo i lalo. E faapefea la ona puipuia mai le pa’ū? Ina ua lē faasili meaalofa nai lo le amio. O nei aso ua i ai le aganuu lē manuia, o le faatāuaina, ta’uleleia ma tauia galuega lelei ua faia e tagata, ua sili atu lea nai lo le faatāuaina o la latou amio. E tatau ona faatāua mea uma e lua – o galuega e fai, ma le amio ia lelei. O lau amio/ou uiga, o le aofa’iga atoa lea o au mea taitasi e fai i le aso.

I le Salamo 15, o loo lisi mai ai e Tavita uiga e 10 e tatau ona maua i soo se tagata faatuatua, aemaise i ta’ita’i e tatau i ai le fa’aaloalo:

(1) E sao la latou amio, e sa’o le savali, e fai le amiotonu. (2) E tautala ma le faamaoni, e lē tuua’i fua. (3) E lē agaleaga i o latou tuaoi, e lē faatupu se mea e faalumaina ai isi. (4) E inosia e i latou le leaga ma mea pi’opi’o. (5) E viia ma lagolago i e matata’u i le Alii. (6) E tausisi i mea latou te folafola ma tautō ai, a e lē ‘alo ai. (7) E lē matape’ape’a pe tu’inanau mo faasiliga i tupe ma oloa. (8) E lē faia ni totogi e faatau ai le amiotonu, e lē talia foi totogi e faatauaso ai le mea moni, ma faasala ai e ua lē sala. (9) E malolosi ma tutumau. (10) E matata’u i le Atua, e alolofa i tagata.

E taualuga e Tavita lana Salamo 15 i lona fai mai, o i latou e faia ia mea, e lē faagaetia lava ia e faavavau. O le auala lena e lavea’iina ai i tatou mai le pa’u’ū soo!

O LE FILOSOFIA GALUE A IESU

Ioane 4, ”³⁴Ua fetalai atu Iesu ia te i latou, “O la’u mea e ‘ai, ia ‘ou faia le finagalo o Lē na auina mai a’u, ma faai’u Lana galuega.”

Nai lo le faapumoomoo o Iesu i sauniga lotu ma lauga o le Aso Sa, e lelei foi le tatou a’oa’o le filosofia o lana galue – lana amio, lana faatāua/faamamafa/faamuamua, ma ona talitonuga e faavae ai lona soifua galue. O le faavae sa Ia soifua ma galue ai e faapenei:

(1). *Ia e manino lelei i lou tofiga.* Fai mai o Ia, e tatau ona faauma/faai’u/faamae’a lelei le galuega na tuuina atu ia te Ia e fai. E malamalama lelei Iesu, o le *tepa taula’i (focus)* i le tofiga ua tuuina i ai, e faatuputeleina ai agavaa ma avanoa. Pe afai o oe e talenia, e sogasogā, to’aga ma malosi, a e te lē vaai ni taunuuga maumaututū, o lona uiga o lou faafitauli atonu o le vaivai o lou *tepa taula’i* i le galuega. A o feagai Ieremia ma le galuega o le toe fausia o pa o Ieruselema, na fai atu ona fili, “²Sau ia, ina tatou fetalai’i i aai i fanua laugatasi o Ono.” (Nee.6). Sa le’i taula’i le vaai a Neemia i nisi tagata po o ni faafitauli, vaganā le galuega o fesaga’i ma ia. Na ia auina atu le sāvali ma le feau, “³O loo faia e a’u le galuega tele, ou te lē mafai ai ona alu ifo.”

(2). *Ia faatulaga lelei tiute i mea e tatau ona faamuamua.* Pe afai e te lē ave lau faamuamua i mea e sili ona tāua, o le a amata ona faatulaga e le galuega lona faasologa e fua i le mana’omia vave. Ma afai e tupu lea tulaga, o le a e misia avanoa lelei. Ina ua tuua e Iesu o Iutaia o le a toe foi i Kalilaia, fai mai Ioane 4, “⁴E ao ina ui atu o ia i Samaria.” I le vaai a le au soo, e foliga mai o se auala ‘ese ua sui, mai le ala pu’upu’u e masani ai. Peita’i o loo i ai se fafine i Samaria o loo finagalo Iesu e faaola; o se vaa lelei o ia e momoli ai le Tala Lelei i le aai atoa o Samaria. O le uiga o lea tala: sa manino lelei Iesu i mea e ave i ai lana faamuamua. E faapefea i tatou?

(3). *Ia fausia lelei se faasologa o tiute fai ia mautū.* I nisi faaupuga, ia seti faalelei le taimi ma le aso e uma ai feau taitasi. Na silafia e Iesu e na o le tolu ma le afa tausaga na tuu atu ia te Ia e faauma ai le galuega, ma na Ia faitaulia aso uma. O se tasi o pepelo tele ua tatou masani ona fai ia i tatou lava e faapea ifo, ‘O le a ou faia i se taimi mulimuli ane’. Auā e uma ane lava e lē faia. Pe afai tatou te fia manuia i taualumaga o le olaga, ia avea le filosofia a Iesu tau le galuega e faata’ita’i i ai a tatou fuafuaga.

(4) *Ia lima ta’ita’iina lelei, ma faatonu folau.* E pei o i tatou uma, sa i ai nisi taimi sa lagona ai e Iesu lona vaivai (“⁴E tatau ona ou faia galuega a Lē ua auina mai a’u, manū o ao; e oo i le po, e lē mafai e se tasi ona galue ai.” Ioa.9). Peitai sa le’i i ai se taimi sa faavaivaia ai o ia e le galuega. Na ta’ita’iina o Ia e le finagalo ma le faasinoga a Lona Tamā, a e le’i ‘aveina o Ia pe tuleia faamalosi e ni mafuaaga po o lagona faaletagata.

(5) *Ia filifili lelei ou lagolago ma fesoasoani.* Na silafia e Iesu le mea e ao ona fai, ma le aofa’i o le taimi e alu ai, ma na Ia filifilia ai se auva’a talafeagai ina ia faataunuuna lea galuega tele. O le to’atolu o i latou – Peteru, Iakopo ma Ioane – o Lana li’o ogatotonu lea. E lē o se faapito pe faailoga tagata; a e na Ia silafia taleni ma agava’a faapitoa o e latou te galulue faatasi ina ia taunuu le sini. O se laasaga tāua mo le faataunuuna o se faamoemoe tele, o le silafia manino lea o ituaiga tagata e manaomia. E ao ona e malamalama ia te i latou i totonu o lou auva’a.

(6) *Ia lelei ala ma aga o fesoataiga.* Sa faa-alu e Iesu le tolu ma le afa tausaga e koloni ai Ona soo a e le’i tuuina atu i ai le pule ia i latou. Pe mata sa Ia fefe ne’i sesē a latou mea e fai, ne’i sili atu mea latou te faia nai lo Ia, pe ina ne’i faalumaina ai ma ta’uvalea o Ia? E leai. Na Ia faamanino ia i latou, “¹²E moni, e moni, ou te fai atu ia te outou, o lē faatuatua mai ia te a’u, e faia lava e ia o galuega ou te faia; e fai foi e ia mea e sili i ia mea, auā ou te alu i lo’u Tamā.” Ioa.14.

(7) *O i tatou o le au galulue faatasi ma Ia.* O Iesu sa avea ma tagata taalo o le ‘au sa faataunuuna galuega e ala i isi o lana ‘au. E ui lava ina e te mafai ona faavasega lelei se galuega, e tuumāvaevae le fuafuaga, ma faafaigaluega tagata talenia talafeagai, e te mana’omia lava se isi tulaga tāua tele ina ia manumalo: o le ‘au galulue (teamwork)! O le galulue faatasi, o le kelū lea na te aumaia tuufaatasi ma faapiipi faatasi tagata – ma faa-galulue faatasi i latou.

Ua faitau silia ma le piliona le au Kerisiano i le lalolagi i nei aso. Ma na amata mai i le lua afe tausaga talu ai, e se tagata e toatasi sa i ai lana silasila mamao, se tasi na ia valaauina ma a’oa’o se au galulue ina ia faataunuu lea silafaga mamao. Pe afai o i tatou o ni tagata atamamai, tatou te a’oa’o lelei ma mulimuli i Lana filosofia i le faiga o le galuega, e manuia ai tatou foi faiva i tofi, tiute ma galuega ua valaauina ai.

E TE LE'I TUAI

“²⁸Le Alii e le Atua, ia e manatu mai, ma e faamalosi mai tau lava i lenei toe mea...” ²⁹Ona lolo'u ai lea e Samasoni i pou e lua i totonu na mau ai le fale, ma lagolago ai, o le tasi i lona lima taumatau ma le tasi i lona lima tauagavale. ³⁰Ua fai atu Samasoni, “Ia ou oti faatasi ma Filisitia.” Ona punou faamalosi lea, ua pa'ū le fale i luga o alii, ma luga o le nuu uma sa i ai; sa toatele e na fasiotia e ia i lona oti i e na fasiotia a o ola ia.

O le tatalo lea a Samasoni i le Atua mai totonu o le fale puipui. Na faapefea ona oo Samasoni i lenei fale puipui? Ona o Talila! Fai mai le tala i le Tusi Paia, *“¹⁶Ua oo ina faatiga ia te ia i lona fai mai i aso uma, ua na faatauanauina o ia;”* O le amio a Satani e lē fiu gofie, a e faatalitali pea mo se avanoa tatou te faatamala ma lē mataala ai, ona ia osofa'i loa lea o i tatou i lana faatauanau i aso uma. O le mea lena e tūa ai ona nofo silafia, e i ai lava faitoto'a i le olaga e lē tatau lē tatau lava ona e tatalaina. Pe afai e te fafaga e faamalie le gālala sesē mo se aso e tasi, e i'ū ina lua taafifili ma lena faafitauli i lou olaga atoa. E i ai se pepa faalauiloa o tusia ai faapea:

O taeao uma i Aferika, e ala a'e le anetelope. E iloa e le anetelope e tatau ona ia tamo'e saosaoa, e sili atu nai lo le saosaoa o le leona, ina ne'i 'aina o ia e le leona ma mate ai. O taeao uma foi e ala a'e le leona. E iloa e le leona e tatau ona tamo'e saosaoa o ia, e sili atu nai lo le saosaoa o le anetelope, ina ne'i leai sana anetelope e 'aina ona mate ai lea. E lē afaina po o oe se anetelope po o se leona; a e afai e oso a'e le la, ia e sauni e te tamo'e saosaoa e te ola ai, ina ne'i e mate.

O le tala fiafia ia Samasoni, sa ia manatua le Atua! Ma o se aso matagofie pe afai e te manatua le Atua ma toe valaau ia te Ia. O le manumalo silisili o Samasoni o loo faamauiina i le mataupu mulimuli o lona soifuaga, ina ua ia toe liliu i le Atua. O loo faamauiina o ia i suafa o toa ta'uta'ua ma siamupini o tagata faatuatua i le Tusi ia Eperu 11. O fea o loo e i ai, o a tulaga o fale puipui ai lou olaga, tau lava ina e manatua, liliu ma toe foi i le Atua. E tele Lona alofa, e talia mai oe, e fesoasoani ia te oe ina ia toe faalelei lou olaga. E te lē o tuai; o lava le taimi, o lava le avanoa, auā e lava le alofa o le Atua.

OSIGA FEAGAIGA

EFKS MANASE

O le taeao fou o le EFKS Manase le Aso Faraile, 22 Aperila 2022 na osia ai la latou feagaiga ma le susuga Piula Pula FS ma le faletua ia Faimeatonu. O le Faifeau Toeaina o le Pulega Gagaifomauga, susuga Tanielu Apineru FT (Safotu) sa ta'ita'i le sauniga mamalu. O le Tusi Paia na faitauina e le susuga Vaueli Sanerivi FS (Faletagalao), o Tatalo na saunia e le susuga Afatia Niue FS (Fagae'e), a o le Lauga na saunia e le susuga Lauititi Vaega FS (Matavai). O le afioga i le tiakono ia Taito Filisi na saunua fai ma sui o le Ekalesia e tusa o la latou filifiliga sa faia ma le faalagolago i le fesoasoani mai o le Agaga Paia. Sa faapea foi ona tali fuaitau le susuga Piula fai mo la'ua sui, e tusa ma lo la'ua talia o le valaau, o le autu lea na a'otauina ai e aveva ma faifeau - mo le galuega tausii nuu e tala'i le Tala Lelei o le Faaolataga, ma tausii le lafu mamoe a le Atua. Sa ia faafetaia foi le Ekalesia i Manase i ona tulaga taue'e, e tusa o la latou faatofalaiga ua afe ane ai ia te i la'ua tagata faatauva. Sa ia faafetaia foi le tapuaiga a o la'ua aiga, o le Faifeau Pule ma le Kolisi Tuasivi, o uo i le Tala Lelei, aemaise o la'ua matua faaleagaga (susuga Penaia Europa FS & Ianeta i A'opo, ma Alesana Afamasaga FS & Siapolima i Lefagaoalii).

Talu ai ona o aiaiga ma puipui o le faama'i, sa le'i mafai ona auai susuga Faifeau Toeaina o le Matagaluega Itu o Tane ma le toatele o le aufaigaluega a le Pulega. Ui i lea sa tapua'i mai pea ma le agaga faafetai i le Atua, ua taunuu le faamoemoe o se tasi o Aulotu o le Matagaluega. Na valaaulia e le Taitai o le Sauniga, le au mau tofi o le sauniga, faapea le afioga Taito Filisi ma le Faletua, le Failautusi o le Pulega susuga Panapa To'o FS (Sasina) e fai ma sui o le Ekalesia Aoa, le Matagaluega, le Pulega ma le Aulotu/afioaga, latou te faatalofa e faafeiloa'i aloa'ia ma faamanuia le Faafegaiga ma le Faletua ma le galuega.

O le susuga Piula Pula FS o se lupe faalele a le EFKS Lefagaoalii, a o le faletua ia Faimeatonu ose taulaga soifua a le EFKS A'opo, ua ta'i 40+ lo la'ua soifua. Na i'ū Piula mai Malua i le 2015, ona galue lea faafaia'oga i Tuasivi ma lagolago i le susuga Penaia ma Ianeta i A'opo. Ua soso'o e la'ua le galuega i Manase sa i ai Filipino Vili FS, ma ona tua atu ia Si'ueva Gogo FT, Afamiliona FS, Ale FS ma isi ua mapu atu i 'a'ao o le Alii e ana le Galuega.

(Penaia Europa FS, Failautusi Matagaluega)

O E U A F A I L A G I L E F O L A U G A

NUKULAE LAE IATI FS

(1959 - 2022) 63 tausaga.

O le susuga ia Nukulaelae Iati FS o le faafeagaiga taulagi a le EFKS Samusu, o le Pulega Aleipata, Matagaluega Lotofaga Lepa Aleipata. Na soifua mai o ia i le tausaga 1959, a e na maliu i le masina o Fepuari 2022, ona o se gasegase tumau sa feagai ma ia. O Nukulaelae ma le faletua ia Tuasivi, e mai le EFKS Tulaele i le Matagaluega Faleata. O se alii Malu o le Malo, a o le'i valaauina e le Atua mo Lana galuega paia; e talenia tele le faifeau i le taaloga o le Piliati. O le tausaga 1994 na ulufale ai i la'ua i le Kolisi Faafaifeau i Malua ma faai'uina ai le taumafai i le tausaga 1997. Na galue i le Matagaluega A'oa'oga Kerisiano mai le 1999 - 2004. O le tausaga 2005 na osia ai la latou feagaiga ma le EFKS Samusu, ma galulue ai se'ia oo ina faamanava e le Atua ana feau. Sa fai o ia ma sui o le Matagaluega LLA i le Komiti o A'oga ma le Komiti o Feau Eeseese; e maliu o ia o se sui o le Komiti Laitiiti/Galue o le KFE, a o le Failautusi o le Pulega Aleipata.

O lona sauniga faale-'aiga sa faia i le Maota Maluu o Letoa Sefo Pa'u i Motootua, na ta'ita'i e Denny Epati FS, a o Hemi Faatonu FS sa faitauina le Tusi Paia ma faia le Tatalo. Na auai le faletua ia Tuasivi ma le fanau, o aiga ma le Ekalesia i Samusu, faapea nisi o Toeaina o le Pulega ma sui o le latou tausaga l'u mai Malua, susuga Efu Efu FT (Aai Niue). Sa auai le Aufaipese EFKS Tulaele na lagiina viiga o le Atua i lea sauniga. Ona taoto ai lea o lona tino i le Fale Maluu se'ia aulia le aso soso'o ai.

O lona toe sauniga sa faia lava i Samusu i le malumalu o le Ekalesia pele na la'ua galulue ai mo le 17 tausaga. O le Toeaina o le Pulega Aleipata, susuga Pati Vili FT na ta'ita'iina le sauniga ma fofogaina Talosaga. Na faaulufaleina atu le sa o le faifeau e le susuga Kolia Matamū FS, o le Tusi Paia na faitauina e Vaai Tua FS, ma Vaituu Palale na saunia le molimau a le Pulega. O le afioga Taitaifono Fono Tele, o le KMTA Matagaluega Lotofaga Lepa Aleipata, susuga Iosefa Atapana Uilelea FT, na valaaulia e faia le lauga ma le Upu faamafanafana mo le faletua ia Tuasivi ma le fanau, le Ekalesia i Samusu, o aiga ma uo uma sa auai i lea sauniga mamalu, faapea i latou uma sa mafai ona auai mai e ala i fesoota'iga faa-tekonolosi. Ona momoli atu lea o lona tino maliu e lagomau i lona aiga i Tulaele, i le sauniga faai'u na saunia e le susuga i le Toeaina ia Pati Vili FT. Ulufale mai ia i le fiafia!

MATAMUA TUI FAITO'AGA TI'A

Aso Lua 7/2/1933 - Aso Faraile 1/4/2022

(89 tausaga + 1 masina + 26 aso)

O le afioga i le alii Tiakono o le EFKS Fa'ala, Pulega Palauli, Matagaluega FAASALELEAGA.

O ona tua'ā: Tamā - Muagututi'a Tolua (Salelologa); Tinā - Pologa Tauti (Mulifanua). O ia le Ulumatua o le fanau e to'a 4. Na a'oga i Felela Mulivai alu ai i Niu Sila 1950s. Foi mai tautua le Aiga, Malo, Nuu ma Ekalesia. Faaipoipo ma Epenesa Laga'aia o Fa'ala Palauli i le 1980, e to'a 5 le fanau, 24 e na tutupu mai ai.

O ona toe sauniga sa faia i le Aso Toona'i, 9 Aperila 2022. O le itula 7.00 i le taeao na 'ave'escina ai lona tino maliu mai le Maota Gasegase o le Malietoa Tanumafili II i Tuasivi, ina ua mae'a le Tatalo faamafanafana a lana Faafeagaiga, le susuga Uilipefosi Konelio FS. (Ia silafia o le taimi tonu lea o puipuiga o le Faama'i Koviti 19, o ona aiaiga e aofia ai le tapula'a o tagata e auai i soo se potopotoga i le to'a 30). Na taunuu i lona aiga i le Fatu i Fa'ala fai ai le Sauniga Lotu na ta'ita'i e le susuga Uilipefosi FS, lagolagosua ai susuga i A'oa'o Fesoasoani ia Vaipou Fatu AF na faitauina le Tusi Paia (Mataio 7:24 - 27) ma Lagaaia Sautia AF na saunia Tatalo. O viiga o le Atua na lagiina e le Aufaipese sa talimau ma faatali atu i fanua. Na faavae le Upu faamafanafana a le susuga i le Ta'ita'i i le manatu autu faapea - IA FAI LOU FALE MAAIGA O LE ATUA, e tusa ma le Faata'oto i le tagata poto sa fausia lona fale i luga o le papa, e le'i maluelue i taimi o le loulouā o uaga ma tafega. Na amata ai foi ma lana molimau i le soifua faatuatua ma le ola auauna o le alii Tiakono, o se tamā sa fausia lona fale i luga o le Papa o Iesu Keriso, ma ave'a ai lona aiga e afio ai le Atua.

Mulimuli ane ona fai lea o lona toe sauniga i le 10.00 i le taeao o lea lava aso, i le Malumalu o le Ekalesia sa tautua ai, le EFKS Fa'ala Palauli. O le susuga lava ia Uili Konelio FS na ta'ita'i le sauniga. O a'u sa faaulufale le sa o le uso, ma faia le tatalo amata na valaauina ai le Agaga Paia mo Lana ta'ita'iga. O le susuga Lagaaia Sautia AF na faitauina le Tusi Paia (Failauga 12: 1 - 7), a o Vaipou Fatu AF na faia le Tatalo. O molimau i le soifua o le Tamā Tiakono na faia e le Tausi ia Epenesa, ma sui o le fanau, o a'u sa fai ma sui o le aiga. E 'au faatasi molimau, o Matamua

Faitoaga se tagata e to'afilemu, o lana savali ma gaiouga uma e faifai malie, e oo i lana tautala (o le soo i lona tina). Peita'i o lana pupula ma lona leo e malosi i nisi taimi, ua talitonuina e mafua i lona alofa e a'oa'i ma faatonu le fanau ma le aiga ia ola lelei ma i'u manuia. O se tamā e alofa faamaoni i lona to'alua pele, le fanau ma le aiga, tainane le nuu aemaise le galuega a le Atua. Sa faamauiina foi alofaaga o le fanau ma aiga tagi mai ala ua lē auai mai ona o Faama'i.

O le molimau ma le Lauga faamafanafana a le susuga i le faafeagaiga ia Uilipefosi Konelio FS na faavae i le Failauga 12:1, ma le manatu autu - 'Se a le uiga o le ola?' Na la'ua taunu atu i le 2004, fausia le malumalu fou i le 2005, o Matamua le tiakono matua o le Ekalesia sa saili i ai le fautuaga i lana tofa e lē soona si'i, a e iloga le loloto ma le mamao sa mafanafana ai, le ta'ita'iga o le galuega e se faifeau talavou. O nisi foi tagata lotu sa faato'a auai atu ina ua mae'a le galuega o le malumalu; a o Matamua sa le'i 'alo, faanoi pe faatafa, e ui ina sa i ai ona ma'i sa fai ma faata'otolia ai. Sa galue i Komiti ma tofiga uma a le Aulotu ona sa faatuatua, e amio atua ma galue malosi. O lona tula'i mai i le Komiti Taulaga na siitia ai Taulaga mai le \$10,000+ i le 2004 i le \$40,000+ ua i ai nei. Sa talitonu o taulaga faa-EFKS e lē na o se sefulua'i pei o isi, a e 'ave uma pei ona foa'i uma mai le soifua atoatoa o lona Alii Faaola, o Iesu le Faitoaga mo'i. O ana measina ma mea totino (pei o lana taavale fou) sa avanoa i taimi uma e fa'aaoga e le faifeau mo le galuega, o se faata'ita'iga ma se lu'itau malosi mo isi tagata, aemaise o lana fanau i le fa'aauiina o lea tautua lelei. Ina ia 'aua pei o le vale na faaputu 'oa, a ia matata'u i le Atua e maua ai le poto e fai le mea e aupito sili ona lelei ina ia siitia maua atili le viiga o le Atua. Mo Matamua, e ui ina faamalūina le maea ario, ta'e le ipu auro, nuti le kate ma gausia le mea taavili i le vai'eli, ua lē afaina lea; o le mea sili ua puna le vai sa ia tautiga e asu, e feinu malilie ai lana fanau ma le aiga mo le viiga o le Alii. Na tauluga ona toe sauniga i lona 'oli'olisaga tumau sa ou ta'ita'ia, ma faatofa atu ai i le Pese Faamavae a le Au Kerisiano, "*Talofa uso e, tofaina oe.*" ma lagomau ai i lona aiga i le Mafa, Fa'ala Palauli.

"E tumau le faamoemoe ia Iesu ta te toe feiloa'i ai" Ia manuia lau malaga. Faamaise le Atua i le tina ma le fanau ma le aiga, faapea le EFKS Fa'ala.

(Saunia F. Tolua FS)

O LOO PULE LOU TUPU


Ina ua maua e le saienetisi lauiloa ia Alapati Einstein lana fua faatusa (equation) lauiloa o le $E=mc^2$, na ia iloa ai foi, e mafai ona fausia ai se auupega mata'utia. Ma o ni tausaga mulimuli ane, sa faapea lava ona tula'i mai. Pe afai tatou te maua se auala e fai ai se mea, e i ai le aso ma le taimi, e faatino ai lea mea e se isi foi tagata. Tatou te le'i a'oa'oina lava le lesonea o Etena: e lē ave le i ai o le fua o le laau i totonu o le faatoaga, e faapea ane ai e mafai ona 'aina; e lē ave lou mafai ona fai o se mea, e te faapea ane ai o le a fai, ma faia ai lava. O nisi nei o ituaiga mafaufauga faale-tiapolu. E le'i tau ane lava sona manatu, o le Atua e soifua faavavau ma pule aoao, e silisili atu nai lo ia, e mafai ona Ia filifili na te lē fa'aaogaina ona sā ma mamalu, o ona tamali'iaga ma mamanu tau Atua: le Atua e afio i mea uma, ua na faataga o Ia e taofiofia i totonu o le manava o le tina. Le Atua e silafia mea uma, a e mafai ona afio mai e ala i se Pepe lē tauloa. Le Atua e mafaia mea uma, a e tuu atu o Ia e faatautau ma maliu i luga o le satauro.

O le ituaiga Tupu lena e i ai lo tatou Tupu, lo tatou Alii Faaola o Iesu Keriso ma Lana pule – e tu'u Lona mamalu, a e afio mai i le mea o tatou i ai, e pule i le alofa a e lē o le malosi, o ana fuafuaga e faataunu i le soalaupule ma le faatofala'i a e lē o le pulepuletutū, ma le manumalo e auala mai ma faafoliga mai i le oti. Ma pe afai o i tatou o tagatanuu moni o lenei Tupu ma Lana faigamalo, e tatau foi ona tatou mulimuli ma usitai i Lona soifua ma Lana pule. Ua sisi maua luga le fu'a o le manumalo a'ia'i a lo tatou Tupu, ina ua Ia faatoilalo le oti e ala i Lona Toetu manumalo, e pei ona sa faamamalu i lenei foi masina. O loo pule pea o Ia ma faatonutonu taaviliga, taamilosaga ma le gasologa o suiga eseese o lenei lalolagi ma mea o tutupu ai, pei o taua ma faama'i ma ona aafiaga.

E ui ina ua lē o gatasi le futia ma le umele i le Fono Tele a le Ekalesia i lenei tausaga, a e tatou te talitonu ma le usita'i, o loo silafia ma pulea e le Tupu, o Ia foi le Ao o le EFKS, o mea uma o tutupu. E lē auaoa Lana silafaga, na te lē tuulafoa'iina foi Lana Ekalesia i lana folauga, auā o Ia lava o loo Tautai ma Muā'au. Tau ina tatou faatalitali ma le mauiina o Lona fetalai mai, e ala i le faatofalaiga a le Laulau a le Fono Tele, o se finagalo i le Komiti a Tama o le Ekalesia, ma se faai'uga autasi, a o tapua'i le Ekalesia, mo aso talafeagai e tauaofia ai le Fono Tele i lenei tausaga.

ATA O NISI MATAUPU O TUSIA I LENEI LOMIGA

O Ë UA FAI I LAGI LE FOLAUGA



SUSUGA NUKULAE LAE IATI (FS)

EFKS FUSI SAFOTULAFAI



*Susuga Tesimeta Afamasaga FS Failautusi/
Toeaina Faaolioli Pulega Safotulafai, faatasi
ma le susuga Silipa FS & Tagiilima Silipa,
Faafeagaiga EFKS Fusi Safotulafai,
FAASALELEAGA.*

EFKS MANASE, ITU O TANE



*Susuga Piula Pula FS & faletua ia Faimeatonu
Pula ma nisi o le fanau, i le Aso Faraile 22
Aperila o le Osiga Feagaiga ma le EFKS
Manase, Pulega Gagaifomauga,
ITU O TANE.*